

TXIRRINDULARITZA



Marino Lejarreta hiru aldiz sartu da garaile Bulebarrean.

JOXAN GOYA

Marinok hirutan irabazi du
Donostia-Donostia Klasika

DONOSTIA

Donostia-Donostia Klasikak maila handiko irabazleak izan ditu orain arte korritu diren hamar edizioetan. Horien artean, Marino Lejarreta bizkaitarra da garaipen bat baino gehiago lortu dituen txirrindulari bakarra, hiru, hain zuzen ere. Berrizkoa izan zen 1981ko edizioa irabazi zuena, Klasikako lehena, alegia. 1982an eta 1987an ere berak eskuratu zuen garaipena Donostiako Bulebarrean. Horrez gain, 1981n eta 1982an mendiko sailkapena ere irabazi zuen.

Marinok izugarritzko karrerak egin ohi ditu urtero uda partean, baina dirudienez momentu honetan ez dago sasoirik onenean. Teorian, Berrizkoa ez dago faborito nagusien artean, baina, hala ere, kontutan hartzeko txirrindularia da. ONCEko txirrindulariaren ustez, italiarrak dira faboritoak Klasika irabazteko. «Italiarrak forma onean helduko dira eta baita Burgoseko Itzulian izan direnak ere».

Claude Criquelion (1983), Niki Ruttiman (1984), Adrie Van Der

Palmaresa

1981 Marino Lejarreta (Teka)
1982 Marino Lejarreta (Teka)
1893 C. Criquelion (Splendor)
1984 Ruttiman (La Vie Claire)
1985 Van der Poel (Kwantum)
1986 Iñaki Gaston (Kas)
1987 M. Lejarreta (Orbea)
1988 G. Theunisse (PDM)
1989 Zadrobilek (7-Eleven)
1990 M. Indurain (Banesto)

Poel (1985), Iñaki Gaston (1986), Gert-Jan Theunisse (1988), Gerhard Zadrobilek (1989) eta Miguel Indurain (1990) izan dira Bulerbarrean irabaztea lortu duten gainontzeko txirrindulariak. Garaileen artean, Niki Ruttimanena izango da hutsune bakarra. Beste guztiak bertan izango dira, batzuk, Claude Criquelion belgiarraren kasuan bezala, azkeneko aldiz, denboraldiaren amaieran konpetizioa uzteko erabakia hartu bait du. Marino Lejarreta eta Adrie Van Der Poelentzat ere azken aldietakoa izango da.

Zaletuen mitoak

1981ean Donostia-Donostia Klasika hasi zenetik, Marino Lejarreta berriztarra izan da karrerako sinbolo nagusia. Hiru aldiz irabazle (1981, 1982, 1987), behin bigarren (1986), bi aldiz menaiko sailkapenaren irabazle, Marino izan da orain arte korritutako hamar edizioetan garaipena errepikatzea lortu duen txirrindulari bakarra.

Gaur jokatu den karrera oso garrantzitsua izango da Berrizkoarentzat, momentu larriak pasa bait ditu azken aldi honetan. Marino ez dago bere egokiarik onenean, baina karrera ona egiteko desiatzen dago, moralaren aldetik beharrezkoa bait du denboraldi amaieran emaitzak lortu ahal izateko.

Marinok hamaika urte daramatza txirrindularitza profesionalean eta denbora honetan euskal zaletu guztien mito bihurtu da. Iazko Klasikaren eta batez ere Tourreko garaipenaren ondoren, Miguel Indurain ere zaletuen sinbolo bihurtu da eta bera izango da dudarik gabe karrera honetako gizonik garrantzitsuen datozen urteotan. Gipuzkoako zaletu guztiek Donostiako Klasikako bi sinbolo hauek batera ikusteko eta, batez ere, animatu ahal izango dituzte gaur.

FUTBOLA

Lemoaren kontra jokatu du
gaur Athleticek Arlonagusian

Saez pozik dago azken boladan zurigorriek erakutsitako mailarekin

Athletic gogor ari da prestatzen aurrendenboraldian, eta behe mailetako talde bizkaitarren kontrako partiduetan maila polita erakutsi dute zurigorriek. Hori da behintzat Iñaki Saez entrenatzailearen iritzia. Gaur Lemoa izango dute aurkaria, Arlonagusian, eta Saezek hamaikako finkoa erabiliko du; Barakaldoren kontra jokatu zuen desberdina, hala ere.

RAMON BASALDUA / BILBO

Bigarren B mailako Lemoa taldearen kontra jokatu du gaur Athleticek Arlonagusian. Iñaki Saez pozik dago, bere jokalariek Barakaldoren kontra iragan asteazkenean erakutsitako jokoa ona izan zelako. Lasesarren gertatu zen bezala, zurigorrien entrenatzaileak hamasei jokalarik besterik ez ditu eramango Arlonagusiara. Beste alde batetik esan behar, hamasei gizon hauek ez direla Barakaldon egon ziren berdinak izango. Dena den Saezek hamaikako finko bat erabiliko du gaurko partiduan ere.

Athletic gero eta hobeto dabil eta Saezek prest eduki nahi du bere taldea, datorren asteazkenean Logroñesen kontrako partidurako. «Ondo aritu ginen Barakaldoko partiduan eta erritmo bizia mantendu genuen lehiaketa guztian zehar. Defentsan egin genuen lan serioari esker, Barakaldokoek ez zuten gola lortzeko aukera bakar bat bera ere izan», adierazi zuen Iñaki Saezek Lezaman.

Badirudi Athletic taldeak bide ona hartu duela eta Saezek, Barakaldon



Iñaki Saez San Mameseko zaletuei garaipenak eskaintzeko gogoz dago. BASALDUA

jokatutako partiduan izandako helburu berberak ditu gaur Arlonagusian. «Barakaldon erakutsitako joko maila mantentzea gustatuko litzaidake gaur Arlonagusian Lemoaren kontra. Datorren astetik aurrera partidu gogorak ditugu eta pixkanaka pixkanaka, taldeak hobera egin beharko luke», esan zuen Saezek.

Lesionaturik dauden jokalariei dagokienez, Oskar Tabuenkak min-duta du ezker eskua, zapaldu egin

bait zioten Barakaldoren kontrako partiduan. Valverde eta Alkortak arazo batzuk dituzten arren, prest egongo dira jokatzeko, entrenatzaileak beharrezkoa dela uste badu behintzat. Azkenik, Ripodas, Mendiguren eta Aiarza gero eta hobeto daude eta onerako bide horretan jarraitzen badute, nafarrak eta Valladolidetik etorritako gizonak, taldearekin jokatzeko aukera izango dute datorren astean.

Osasunak ez zuen garaipenik
lortu Valentziako Torneoan

A.B. / IRUÑA

Aurrendenboraldi honetako lehen-dabiziko azterketa serioa bazen ere, txantxetan hartu beharko Osasunak Valentzia aldean jokatu zuen txapelketa, azken postuan gelditu bait ziren gorritxoak. Honveden aurka hutsean berdindu ondoren, Levanteren kontra jokatu zuten ostegun gauez, bat eta huts kontrako emaitzarekin. Esan behar da ordezko asko zeudela Zabalzak atera zuen hamaikakoan, baina, hala ere, ez ziren finegi ibili.

Zabalza kexu agertu zen partidua bukatzerakoan, gogor samarra izan zela eta, baina gorritxoek garbi erakutsi zuten oraindik asko falta zaiela bete bete eta jokoan behar den bezala egotea. Aipatzekoa da Stevanovic, arazo fisikoak gorabehera, partidua osoa jokatu zuela, oso fin

aritu ez bazen ere. Alde txarra, dudarik gabe, epaileak erakutsitako txartelak. Osasunako sei jokalarik jaso zuten txartel horia, eta Txomin Larraizari gorria erakutsi zion Burruco Moreno jaunak. Gehiegitxo txapelketaz kanpoko partidu baten-tzat.

Bestalde, Urbanek bere selekzionatzailearen deia jaso du berriro ere, eta abuztuaren 14an, taldeak oneritzi emanaz gero, Frantziaren aurka arituko da Poloniarra. Ondoren, Suedia eta Holanda izango dute arerio.

Esan behar ere Nuñez altsasuarra iazko Osasunaren hirugarren atezaina talderik gabe dabilela, Granadatik itzuli ondoren. Jokalaria bertara joan zen jokatzeko asmoz, baina baldintzak ez zirela onak eta, itzultzea erabaki du, eta zerbait atera arte, Promesekin arituko da entrenatzen.



Jan Urban poloniarra. C. VILLAGRAN